

Na osnovu čl. 8. i 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06 i 51/09), člana 50. Zakona o komunalnim djelatnostima („Službene novine HNK“ broj: 4/16) i člana 16. Statuta Grada Konjica ("Službeni glasnik Grada Konjica", broj: 10/22), Gradsko vijeće Grada Konjica na sjednici održanoj 28.03.2025 godine,
d o n o s i

O D L U K U O KOMUNALNOJ NAKNADI

I - OPĆE ODREDBE

Član 1.

Ovom Odlukom uvodi se obaveza plaćanja komunalne naknade za korištenje objekata, uređaja i usluga iz komunalnih djelatnosti zajedničke komunalne potrošnje na području grada Konjica, utvrđuju obveznici plaćanja komunalne naknade, određuju osnovi i mjerila za utvrđivanje visine komunalne naknade, zone na području grada Konjica u kojima se naplaćuje komunalna naknada, broj bodova za izračunavanje komunalne naknade po zonama i namjeni objekata, način obračuna komunalne naknade i druga pitanja od značaja za provođenje Odluke.

Član 2.

Komunalne djelatnosti zajedničke komunalne potrošnje u smislu Zakona o komunalnim djelatnostima HNK („Službene novine HNK“ broj: 4/16), su:

- a) održavanje čistoće na javnim površinama;
- b) odvodnja atmosferskih i drugih voda s javnih površina;
- c) održavanje javnih površina;
- d) održavanje javnih saobraćajnih površina u naselju;
- e) upravljanje objektima i uređajima javne rasvjete;
- f) obavljanje usluga dekorisanja;
- g) održavanje groblja i spomen obilježja;
- h) obavljanje kafilerijskih usluga;
- i) održavanje javnih česmi i fontana, javnih kupatila i javnih nužnika;
- j) zbrinjavanje komunalnog otpada nastalog u okviru djelatnosti zajedničke komunalne potrošnje;
- k) čišćenje i razgrtanje snijega i leda s javnih gradskih površina, lokalnih puteva i posipanje abrazivnim materijalom ulica i lokalnih puteva.

Pored djelatnosti zajedničke komunalne potrošnje iz prethodnog stava ovom Odlukom utvrđuje se da je zajednička komunalna djelatnost i saniranje divljih deponija, otpada na javnim površinama, a posebno na površinama koje služe za zaštitu okoliša i zaštitu voda (oko puteva, hidro akumulacija i sl.), zaštita vodozahvata i vodospremnika kao djelatnosti od posebnog općeg interesa za grad.

Zajednička komunalna potrošnja je i odvodnja atmosferskih i drugih voda sa javnih površina, održavanje čistoće, te održavanje javnih površina koje se koriste u svrhu prilaska objektima linijskog i mrežnog karaktera i njihovog održavanja.

Član 3.

Odlukom o komunalnoj naknadi kojom se uvodi obaveza plaćanja komunalne naknade, utvrđuje se:

- a) obveznici plaćanja komunalne naknade;
- b) osnova i mjerila za utvrđivanje visine komunalne naknade;

- c) naseljena mjesta na području jedinice lokalne samouprave u kojima se naplaćuje komunalna naknada;
- d) broj i granice zona za obračun komunalne naknade;
- e) koeficijenti zona (Kz) za pojedine zone;
- f) koeficijent namjene (Kn) za poslovni prostor i građevinsko i drugo zemljište koje služi u svrhu obavljanja poslovne djelatnosti;
- g) način obračuna komunalne naknade;
- h) način i rokove plaćanja komunalne naknade;
- i) vođenje evidencije obveznika plaćanja komunalne naknade;
- j) oslobađanje od obaveze plaćanja komunalne naknade;
- k) namjena i način korištenja sredstava od komunalne naknade;
- l) druga pitanja od značaja za provođenje odluke o komunalnoj naknadi.

II – OBVEZNICI PLAĆANJA KOMUNALNE NAKNADE

Član 4.

Obveznici plaćanja komunalne naknade su;

- a) vlasnik stambenog prostora, odnosno njihov korisnik kada je tu obavezu vlasnik ugovorom prenio na istog;
- b) vlasnik poslovnog prostora, odnosno njihov korisnik kada je tu obavezu vlasnik ugovorom prenio na istog;
- c) vlasnik proizvodnog prostora, odnosno njihov korisnik kada je tu obavezu vlasnik ugovorom prenio na istog;
- d) vlasnik garažnog i drugog pomoćnog prostora, odnosno njihov korisnik kada je tu obavezu vlasnik ugovorom prenio na istog;
- e) korisnik otvorenog prostora koji se koristi u svrhu obavljanja poslovne djelatnosti (skladišta, stovarišta, tržnice, objekti linijskog ili mrežnog karaktera, hidroakumulacija, solarne elektrane, vjetroelettrane, šumske površine i sl.).

Komunalna naknada se plaća za objekte koji služe za obavljanje djelatnosti na području grada Konjica, koji su opremljeni objektima i uređajima zajedničke komunalne potrošnje i na kojima se obavlja najmanje jedna komunalna djelatnost zajedničke komunalne potrošnje.

Komunalna naknada se plaća za korištenje zemljišta u prirodi (eksploatacija kamena, šljunka i mineralnih sirovina) i za druge namjene čijim se korištenjem ostvaruju određene koristi za pojedine pravne i fizičke osobe ako Zakonom i Odlukom Gradskog vijeća nije drugačije određeno.

Član 5.

Obveznik plaćanja je dužan da podnese prijavu za utvrđivanje visine naknade u roku od 15 dana od dana početka korištenja prostora iz člana 4. ove Odluke, a obaveza plaćanja komunalne naknade nastaje od prvog dana narednog mjeseca nakon početka korištenja prostora za koji se plaća naknada.

Ako na jednoj nekretnini ima više nosioca prava korištenja, odnosno vlasnika Služba prostorno uređenje, građenje, zaštita okoline i komunalne poslove će donijeti posebno rješenje za svakog nosioca prava korištenja, odnosno suvlasnika nekretnine proporcionalno njegovom dijelu u korištenju ili suvlasništvu.

Član 6.

Obveznici plaćanja komunalne naknade iz člana 4. ove Odluke dužni su obavijestiti Službu za prostorno uređenje, građenje, zaštita okoline i komunalne poslove ukoliko dođe do promjene nosioca

prava vlasništva ili korištenja na prostorima i površinama, najkasnije u roku 15 (petnaest) dana od dana nastale promjene.

Ukoliko obveznik plaćanja komunalne naknade ne prijavi promjenu na način koji je predviđen u stavu 1. ovog člana, plaćanje komunalne naknade ostaje njegova obaveza.

III - OSNOV I MJERILA ZA UTVRĐIVANJE VISINE KOMUNALNE NAKNADE

Član 7.

Osnov za utvrđivanje visine komunalne naknade je ukupna neto površina poslovnog, garažnog i drugog pomoćnog prostora, proizvodnog pogona, otvorenog prostora te građevinskog zemljišta, a za stambeni prostor će se utvrditi paušalno i to na način :

- a) Stambeni prostor - paušalno za I, II, III i IV zonu
- b) Poslovni i otvoreni prostor – neto površina prostora izražena u jedinici mjere (m²);
- c) Garažni i drugi pomoćni prostor - neto površina prostora izražena u jedinici mjere (m²);
- d) Proizvodni pogon - neto površina pogona izražena u jedinici mjere (m²);
- e) Građevinsko zemljište i drugo zemljište koje se koristi u svrhu obavljanja poslovne djelatnosti - stvarna površina zemljišta koje se koristi izražena u jedinici mjere (m²);
- f) za neizgrađeno građevinsko i drugo zemljište i ostalo zemljište koje se koristi u svrhu obavljanja poslovne djelatnosti - stvarna površina zemljišta koje se koristi izražena u jedinici mjere (m²).

Pod neto i stvarnom površinom prostora iz ovog člana podrazumijeva se zbir podnih površina svih etaža određenog prostora.

Član 8.

Iznos komunalne naknade određuje se prema sljedećim kriterijima:

- a) stepenu opremljenosti građevinskog i drugog zemljišta objektima i uređajima komunalne infrastrukture;
- b) razvijenosti javnog prijevoza putnika;
- c) lokaciji nekretnine po građevinskim zonama koje su utvrđene ovom odlukom;
- d) namjeni objekta, odnosno prostora.

IV- MJESTA NA PODRUČJU GRADA KONJICA U KOJIMA SE OBRAČUNAVA KOMUNALNA NAKNADA

Član 9.

Obaveza plaćanja komunalne naknade odnosi se na cijelo područje grada Konjica zavisno kojoj građevinskoj zoni pripada, proizvodni, poslovni i otvoreni, garažni i drugi pomoćni prostori, te građevinsko i drugo zemljište.

Obaveza plaćanje komunalne naknade za stambene prostore utvrđuje se paušalno i odnosi se na I, II, III i IV zonu.

V- BROJ I GRANICE ZONA ZA OBRAČUN KOMUNALNE NAKNADE

Član 10.

Prema položaju i pogodnosti lokacije u odnosu na nivo opremljenosti komunalnim objektima i uređajima zajedničke komunalne potrošnje, te obimu i kvalitetu obavljanja komunalnih djelatnosti zajedničke komunalne potrošnje, područje grada Konjica dijeli se na 6 (šest) zona.

- **ZONA I**
- **EXTRA ZONA** (Trg državnosti – Alija Izetbegović i svi objekti uz ulicu Maršala Tita sa obje strane)
- **PRVA A**
 - a) Pojas između rijeke Neretve i Trešanice s donje strane ispred robne kuće, lokalitet pijace do Starog mosta,
 - b) Željeznička ulica od željezničke stanice do Trga državnosti-Alija Izetbegović, od Starog mosta do tunela prema lokalitetu UNIS-a,
 - c) Područje od Trga državnosti- Alija Izetbegović do Trešaničkog mosta uz magistralni put M-17.
- **ZONA II**
 - a) Naselje Kolonija od Novog mosta zaključno sa objektom treće benzinske pumpe,
 - b) Ulica Luka, Civilnih žrtava rata, preostali dio Željezničke ulice, Pave Anđelića, 4. muslimanske brigade, Omladinska, Pleha, Suhi Do uz ulicu Musala do objekta PU Konjic,
 - c) Pojas uz lijevu obalu rijeke Neretve između ulice Varda, Huseinbegova, i Neretva sa nizom objekata sa obje strane ul. Varda, od Starog mosta do raskršća Kolonija (I benzinska pumpa),
 - d) Ulica Stara čaršija i Zuke Džumhura do presjecišta sa ul. Konjičkog bataljona.
- **ZONA III**
 - a) Ulica Donje Polje pojas od PU Konjic do gornje Igmanske kapije,
 - b) Područje uzvodno od Trešanice, od ulice Pave Anđelića uz magistralni put M-17 do granice grada Konjica (tunel Bradina)
 - c) Nastavak ulice Luka i oko sportskog centra do Željezničkog mosta,
 - d) Naselje Radava, Varda, Tuleg do usponskog dijela (oko I osnovne škole), Stari grad, Orašje, I i II, Zlatrgovina, Tuščica, i Donje Selo,
 - e) Uz magistralni put M-17, od treće benzinske pumpe do Ribićkog mosta (granica područja grada),
 - f) Zaštitne zone Boračkog i Jablaničkog jezera, rijeke Neretve uzvodno od Konjica, rijeke Baščica i Lađanica i sl.
- **ZONA IV**
 - a) Područje od gornje Igmanske kapije do objekta Ljuta,
 - b) Repovica,
 - c) Naselje Drecelj uz potok ka Zaslavlju,
 - d) Objekti uz regionalne puteve za područja koja nisu obuhvaćena do 3. zone,
 - e) Naselje Čelebići, Podorašac i Bradina,
 - f) Područje od Tuščice, Glavičine, Tuleg (usponski dio).
- **ZONA V**
 - a) Glavatičevo
 - b) Buturović polje,
 - c) Spiljani,
 - d) Džajići
 - e) Bijela,
 - f) Odžaci.
- **ZONA VI**
 - Sva preostala naseljena mjesta na području grada Konjica.

VI - KOEFICIJENTI ZA IZRAČUN KOMUNALNE NAKNADE

Član 11.

Iznos komunalne naknade (IKN) po kvadratnom metru (m²) korisne površine prostora ili metru dužnom (m1) ove Odluke utvrđuje se množenjem sljedećih vrijednosti:

(B) Vrijednost obračunske jedinice – boda izražen u KM

(Kz), Koeficijent zone, određuje se na osnovu pripadnosti objekta u određenoj zoni područja Grada

(Kn) Koeficijent namjene, određuje se na osnovu namjene prostora i zemljišta

(P) Površina prostora izražena u jedinici mjere m² ili m1

Član 12.

Vrijednost obračunske jedinice - boda (B) za poslovni prostor, garažni i drugi pomoćni prostor, proizvodni prostor, građevinsko i drugo zemljište u skladu sa odredbama ove Odluke utvrđuje se u iznosu od 0,15 KM za zatvorene prostore i u iznosu od 0,10 KM za otvorene prostore.

VII - UTVRĐIVANJE KOEFICIJENTA ZA IZRAČUN KOMUNALNE NAKNADE ZA POSLOVNI, PROSTOR, GARAŽNI I DRUGI POMOĆNI PROSTOR, PROIZVODNI PROSTOR, GRAĐEVINSKO I DRUGO ZEMLJIŠTE KOJE SLUŽI U OBAVLJANJU POSLOVNE DJELATNOSTI

Član 13.

Koeficijent zone (Kz) za prostore iznosi:

R.b.	Zona	Koeficijent zone
1.	I Zona	1,10
2.	II Zona	0,80
3.	III Zona	0,60
4.	IV Zona	0,50
5.	V Zona	0,40
6.	VI Zona	0,30
7.	Ostalo građevinsko i drugo zemljište	0,25

Član 14.

Koeficijent namjene (Kn) iznosi:

R.b.	Namjena prostora i zemljišta	Koeficijent namjene
------	------------------------------	---------------------

1.	Prostori koji služe za obavljanje djelatnosti koje ugrožavaju ili mogu ugroziti životnu okolinu	3,00
2.	Eksploatacija, kamena, šljunka i mineralnih sirovina	1,50
3.	Poslovni prostor za obavljanje neproizvodnih djelatnosti (uslužne djelatnosti i sl.)	1,00
4.	Poslovni prostor za obavljanje proizvodnih djelatnosti	0,75
5.	Stambeni, garažni, pomoćni i ostali prostori	0,50

VIII – NAČIN OBRAČUNA KOMUNALNE NAKNADE

Član 15.

a) Komunalna naknada za korisne površine je jedinica mjere (m²) ili (m1), a ista se obračunava po sljedećoj formuli $IKN (KM) = B \times Kz \times Kn \times P$

Izračunom na gore navedeni način dobiva se visina komunalne naknade na mjesečnom nivou za svakog obveznika.

b) Komunalna naknada se naplaćuje za solarne elektrane za bruto korisnu površinu u m² koja služi za obavljanje djelatnosti u iznosu od 1,5 KM

c) Komunalna naknada se naplaćuje za vjetrenjače po m² zauzete korisne površine zemljišta koje služi za obavljanje djelatnosti u iznosu od 1,5 KM.

d) Komunalna naknada za objekte linijskog i mrežnog tipa, te objekte koji se iskazuju po snazi, utvrđuje se u mjesečnom iznosu na sljedeći način:

Komunalna naknada za linijske objekte, kao što su podzemni i nadzemni niskonaponski vodovi, srednje i visokonaponski prijenosni elektro vodovi koji se iskazuju po naponu u kV, te objekte koji se iskazuju po snazi (trafostanice u kVA i transformatorska postrojenja u MVA) komunalna naknada utvrđuje se u mjesečnom iznosu prema naponu ili snazi objekata i ostalim parametrima kako slijedi:

Red. br	Vrsta objekta	Napon ili Snaga	Jedinica mjere	Komunalna naknada
1	Visokonaponski prijenosni vodovi	400 kV	1 km L	200,00 KM
2	Visokonaponski prijenosni vodovi	220 kV	1 km L	150,00 KM
3	Visokonaponski prijenosni vodovi	110 kV	1 km L	100,00 KM
4	Srednje napon, vodovi	35 kV	1 km L	75,00 KM

5	Srednji napon, vodovi	20 kV	1 km L	60,00 KM
6	Srednje napon, vodovi	10 kV	1 km L	50,00 KM
7	Srednje napon, vodovi	10 kV	1 km L	50,00 KM
8	Niskonaponski vodovi	0,4 kV	1 km L	5,00 KM
9	Niskonaponski vodovi	0,4 kV	1 km L	10,00 KM
10	MHE	do 5 MW	1 km L	75,00 KM
11	MHE	Preko 5 MW	1 km L	80,00 KM
12	Transformatorsko postrojenje	20 MVA 110/35/10 20 kV	1 objekt	500,00 KM
13.	Transformatorske stanice	do 250 kVA	1 objekt	30,00 KM
14	Transformatorske stanice	od 250 do 630 kVA	1 objekt	60,00 KM
15	Transformatorske stanice	preko 630 kVA	1 objekt	100,00 KM

d) Za **linijske objekte** kao što su podzemni ili nadzemni telekomunikacijski vodovi, za objekte mrežnog tipa, mreže fiksne telefonije s TK centrale, mreže GSM operatera s baznim stanicama, komunalna naknada utvrđuje se prema značaju objekta u mjesečnom iznosu kako slijedi:

Red. br	Vrsta objekta	Jedinica mjere	Komunalna naknada
1	Telekomunikacijski vodovi	1 km L	65,00 KM
2	TK mreža na području Grada Konjica po pojedinim centralama	1 km L	50,00 KM
3	Bazne stanice	1 objekat	50,00 KM

Član 16.

Mjesečni iznos komunalne naknade za stambene prostore na području grada Konjica za I, II, III i IV zonu utvrđuje se paušalno.

IX - NAČIN I ROKOVI PLAĆANJA KOMUNALNE NAKNADE

Član 17.

Komunalna naknada je javni prihod Grada Konjica. Komunalna naknada uplaćuje se na depozitni račun Budžeta Grada Konjica na osnovu rješenja o komunalnoj naknadi iz člana 18. ove Odluke.

Član 18.

Rješenje o utvrđivanju obaveze plaćanja komunalne naknade za svakog obveznika donosi Služba za prostorno uređenje, građenje, zaštitu okoline i komunalne poslove.
Na Rješenje iz stava 1. ovog člana može se izjaviti žalba Žalbenom vijeću Grada Konjica.

Član 19.

Ukoliko Gradsko vijeće Grada Konjica izvrši promjenu vrijednosti obračunske jedinice - boda (B), koeficijenta zone ili koeficijenta namjene, Služba za prostorno uređenje, građenje, zaštitu okoline i komunalne poslove donosi novo rješenje za svakog obveznika.

Član 20.

Rješenjem o komunalnoj naknadi utvrđuje se obaveza plaćanja komunalne naknade, površina, odnosno dužina instalacija za koju se plaća komunalna naknada u godišnjem iznosu.

Član 21.

Komunalna naknada plaća se najkasnije do 15. (petnaestog) u tekućem mjesecu, za protekli mjesec, ako rješenjem Službe za prostorno uređenje, građenje, zaštitu okoline i komunalne poslove nije drugačije definisano.
Rješenjem Službe za prostorno uređenje, građenje, zaštitu okoline i komunalne poslove može se utvrditi da pojedini obveznici plaćaju komunalnu naknadu tromjesečno, polugodišnje ili čitav iznos za cijelu godinu ako se time postiže veća efikasnost i ekonomičnost naplate.
Obaveza plaćanja komunalne naknade nastaje prvog dana narednog mjeseca od početka korištenje prostora, zemljišta ili instalacija za obavljanje djelatnosti.

X – VOĐENJE EVIDENCIJE OBVEZNIKA PLAĆANJA KOMUNALNE NAKNADE

Član 22.

Službe za prostorno uređenje, građenje, zaštitu okoline i komunalne poslove vodi i uređuje evidenciju obveznika plaćanja komunalne naknade koja sadrži:

- podatke o fizičkoj, odnosno pravnoj osobi obveznika plaćanja komunalne naknade;
- podatke o nekretninama, prostorima i zemljištu;
- pripadnost određenoj zoni;
- namjenu i vrstu djelatnosti poslovnog prostora;
- druge podatke bitne za utvrđivanje obaveze plaćanja komunalne naknade, utvrđivanja visine komunalne naknade oslobođanje ili prestanak obaveze plaćanja komunalne naknade.

Član 23.

Evidencija o obveznicima komunalne naknade za poslovni i proizvodni prostor sadrži:

- naziv poslovnog subjekta,
- sjedište i adresu obveznika komunalne naknade,
- bruto izgrađenu površinu poslovnog i proizvodnog prostora izraženog u jedinici mjere (m²), odnosno stvarnu površinu građevinskog i drugog zemljišta za drugi prostor na kome se obavlja ili neposredno služi za obavljanje djelatnosti izraženu u jedinici mjere (m²),
- pripadnost građevinskoj zoni,
- namjenu prostora uključujući vrstu djelatnosti
- druge potrebne podatke.

Član 24.

Evidencija o obveznicima komunalne naknade za korištenje zemljišta u prirodi (eksploataciju kamena, šljunka i dr.) sadrži:

- Naziv poslovnog subjekta,
- sjedište i adresu obveznika komunalne naknade,
- metar (m²) korištene površine,
- pripadnost građevinskoj zoni,

- druge podatke od uticaja za nastanak obaveze.

Član 25.

Evidencija o obveznicima komunalne naknade utvrđuje se i vodi na osnovu podataka koji se prikupljaju po službenoj dužnosti iz:

- prijave obveznika komunalne naknade,
- neposrednog uvida i mjerenja na licu mjesta,
- ugovora o zakupa poslovnog, proizvodnog ili drugog prostora,
- odobrenje za građenje i odobrenja za upotrebu izgrađenih objekata,
- odobrenje za rad i utvrđivanje minimalno tehničkih uslova i drugih uslova poslovnih i proizvodnih objekata i prostora,
- službene evidencije nadležnih službi i institucija koje posjeduju podatke, evidencije javnih komunalnih preduzeća na području grada Konjica, evidencije upravitelja zgrada i drugih izvora.

Član 26.

Kontrolu naplate komunalne naknade kao i pokretanje postupka prisilne naplate vrši Služba za prostorno uređenje, građenje, zaštitu okoline i komunalne poslove Grada Konjic u saradnji sa Službom za ekonomsko-fnansijske i pravne poslove, kao i Javno pravobranilaštvo Grada Konjic, svako u okviru svoje nadležnosti.

XI - OSLOBAĐANJA OD OBAVEZE PLAĆANJA KOMUNALNE NAKNADE

Član 27.

Oslobađaju se od plaćanja komunalne naknade vlasnici odnosno korisnici objekata i zemljišta, uređaja i instalacija za zajedničko i pojedinačno korištenje i to:

- objekte i uređaje koji služe za proizvodnju i pružanje komunalne usluge,
- zgrade i prostorije čiji su korisnici: udruženja proistekle iz odbrambeno-oslobodilačkog rata,
- organizacije socijalne i zdravstvene zaštite, crvenog križa, savezi, društva i organizacije distrofičara, invalida slijepih i gluhih i drugih kategorija invalidnih lica, te druga udruženja građana koja se bave humanitarnim radom,
- zgrade i prostorije koje služe kao muzeji,
- zgrade i prostorije koje služe za obavljanje vjerskih obreda, profesionalnih vatrogasnih jedinica i dobrovoljnog vatrogasnog društva,
- predškolske ustanove,
- zgrade i prostorije koje koriste odgojno-obrazovne organizacije srednjeg i osnovnog obrazovanja,
- gradska biblioteka i druge javne ustanove iz oblasti kulture i sporta,
- poljoprivredni objekti namijenjeni individualnim poljoprivrednim gazdinstvima.

Oslobađaju se od plaćanja komunalne naknade vlasnici stambenih objekata koji su korisnici stalne socijalne pomoći, kao i korisnici najniže penzije.

Iznimno iz stava 1. ovog člana, komunalna naknada se plaća za prostorije koje vlasnici ili korisnici daju u zakup radi obavljanja druge djelatnosti.

Komunalna naknada se ne plaća za poslovne prostore u stambeno-poslovnim objektima u kojima se ne obavlja djelatnost.

Poslovni subjekti u godini registracije oslobađaju se od plaćanja komunalne naknade.

XII - NAMJENA SREDSTAVA OSTVARENIH NAPLATOM KOMUNALNE NAKNADE

Član 28.

Sredstva uplaćena na ime komunalne naknade koristit će se namjenski za finansiranje obavljanja komunalnih djelatnosti zajedničke komunalne potrošnje utvrđenim u članu 2. ove Odluke.

XIII - NADZOR

Član 29.

Upravni nadzor nad sprovođenjem ove Odluke vrši Služba za prostorno uređenje, građenje, zaštitu okoline i komunalne poslove i Služba za ekonomsko-finansijske i pravne poslove Grada Konjica svaka iz svoje nadležnosti.

Član 30.

Inspekcijski nadzor nad provedbom ove Odluke vrši gradski inspektor za komunalne poslove, u skladu sa Zakonom o komunalnoj djelatnosti HNK.

XIV- KAZNE NE ODREDBE

Član 31.

1. Novčanom kaznom u iznosu od 3.000,00 KM do 10.000,00 KM kaznit će se za prekršaj poslovni subjekt – obveznik plaćanja komunalne naknade, ako u utvrđenom roku iz člana 5. ove Odluke ne prijavi Službi za prostorno uređenje, građenje, zaštitu okoline i komunalne poslove obavezu plaćanja komunalne naknade ili promjenu koja utiče na utvrđivanje obaveznika plaćanja komunalne naknade u skladu sa članom 6. ove Odluke.
2. Za prekršaj iz stava 1. ovog člana kaznit će se i odgovorno lice u pravnom licu novčanom kaznom od 1.000,00 KM do 5.000,00 KM.
3. Novčanom kaznom u iznosu od 500,00 KM do 1.000,00 KM kaznit će se za prekršaj fizičko lice - obveznik plaćanja komunalne naknade koji ne postupi u skladu sa članom 5. i 6. ove Odluke.

XV - PRELAZNE I ZAVRŠNE ODREDBE

Član 32.

Služba za prostorno uređenje, građenje, zaštitu okoline i komunalne poslove, obavezuje se da će do 31.12.2025. godine prikupiti potrebne podatke, a u skladu sa članom 25. ove odluke.

Služba za prostorno uređenje, građenje, zaštitu okoline i komunalne poslove, obavezuje se da će od 01.01.2026. godine pristupiti donošenju rješenja za obveznike komunalne naknade u skladu sa ovom Odlukom.

U slučaju neplaćanja komunalne naknade na način propisan ovom Odlukom, svoja potraživanja Grad Konjic će u skladu sa važećim propisima ostvarivati u postupku pred nadležnim Sudom.

Član 33.

Odluka stupa na snagu danom objavljivanja u „Službenom glasniku Grada Konjica” i ima se objaviti na oglasnoj tabli Grada Konjica.

Predsjednik Gradskog vijeća
Kenan Greda, s.r.